



**Broj:**02-04-652/22

**Datum,** 06.05.2022.godine

## ZAPISNIK

### sa 16. redovne sjednice 7. saziva Općinskog vijeća Doboj Istok

Šesnaesta redovna sjednica 7. saziva Općinskog vijeća održana je dana 28.04.2022. godine u zgradi općine Doboj Istok u Klokočnici sa početkom u 10,00 sati.

**PRISUTNI:** 15 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko invalidsku zaštitu i opću upravu, Nermin Mrkanović, predsjednik Općinske izborne komisije Doboj Istok, Emira Skula, direktorica JU za predškolski odgoj i obrazovanje „Dječija radost“ Doboj Istok i Kenan Mujkić, direktor JZU Dom zdravlja Doboj Istok.

**ODSUTNI:** Senada Džanić, predsjednica kluba vijećnika SBB i BPS.

Sjednicu je otvorio i vodio zamjenik predsjedavajućeg Općinskog vijeća, Izet Hodžić.

Izet Hodžić, zamjenik predsjedavajućeg Općinskog vijeća: „Uvaženi načelnice sa saradnicima, poštovani kolege i kolegice općinski vijećnici, direktore javne ustanove i predsjednice Općinske izborne komisije želim sve srdačno da vas poselamim i pozdravim. Otvaram 16. redovnu sjednicu 7. saziva Općinskog vijeća Doboj Istok i predlažem da krenemo sa zvaničnim radom ove sjednice. Molim tehničkog sekretara da utvrdi broj prisutnih na današnjoj sjednici. Konstatujem da je prisutno 15 vijećnika i da Vijeće može pravosnažno donositi odluke. Odsutna je Senada Džanić, koja je najavila odsustvo i iskoristio bih priliku da našoj kolegici Senadi poželim brz postoperativni oporavak i da se što prije vrati u vijećničke klupe.“

### USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Izet Hodžić, zamjenik predsjedavajućeg Općinskog vijeća: „Dobili ste Zapisnik sa 15. redovne sjednice Općinskog vijeća Doboj Istok, kao i Zapisnik sa 3. hitne sjednice Općinskog vijeća i dajem mogućnost ako neko ima primjedbi na zapisnike. Nema. Ko je za usvajanje zapisnika sa 15. redovne sjednice?“

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasnom odlukom prisutnih vijećnika usvojen zapisnik sa 15. redovne sjednice.

Ko je za usvajanje zapisnika sa 3. hitne sjednice?“

Glasanje: ZA – 15, PROTIV – 0, UZDRŽANIH – 0.

Također konstatujem da jednoglasnom odlukom prisutnih vijećnika usvojen i ovaj zapisnik.“

### VIJEĆNIČKA PITANJA

Izet Hodžić, zamjenik predsjedavajućeg Općinskog vijeća: „Ako ima neko od prisutnih vijećnika ili vijećnica pripremljeno vijećničko pitanje dajem mogućnost. Konstatujem da nema pripremljenih vijećničkih pitanja.“

### USVAJANJE DNEVNOG REDA

Izet Hodžić, zamjenik predsjedavajućeg Općinskog vijeća: „Kolegij Općinskog vijeća je na svojoj zadnjoj sjednici donio prijedlog dnevnog reda od 10 tačaka i taj prijedlog dnevnog reda ste dobili u materijalima, s tim što imamo prijedlog za proširenje dnevnog reda. Ovaj prijedlog za proširenje dnevnog reda dobili ste na svoje mejl adrese, a isti ste dobili i u printanoj formi na stolu. Pretpostavljam da ste

pročitati o čemu se radi i ja vas pozivam da se izjasnimo o prijedlogu za proširenje dnevnog reda po ovoj tački. Ko je za?

Glasanje: ZA – 12, PROTIV – 0, UZDRŽANIH – 3.

Konstatujem da prijedlog za proširenje dnevnog reda usvojen sa 12 glasova za i 3 uzdržana, tako da ovaj prijedlog ide na dnevni red. Konstatujem da za današnju sjednicu imamo 11 tačaka dnevnog reda.

Predloženi dnevni red je sljedeći:

1. Razmatranje i usvajanje prijedloga Odluke o učešću u akciji nabavke Endoskopskog stuba
2. Razmatranje i usvajanje prijedloga Odluke o poništenju Odluka o imenovanju i razrješenju člana Općinske izborne komisije Doboj Istok,
3. Razmatranje i usvajanje prijedloga Odluke o razrješenju člana Općinske izborne komisije Doboj Istok,
4. Razmatranje i usvajanje prijedloga Odluke o imenovanju člana Općinske izborne komisije Doboj Istok,
5. Razmatranje i usvajanje Izvještaja o izvršenju budžeta u općini Doboj Istok za 2021. godinu
6. Razmatranje i usvajanje Izvještaja o utrošku sredstava budžetske rezerve za 2021. godinu
7. Razmatranje i usvajanje Izvještaja o radu JU za predškolski odgoj i obrazovanje „Dječja radost“ Doboj Istok za 2021. godinu
8. Razmatranje i usvajanje Izvještaja o radu JZU Dom zdravlja Doboj Istok za 2021. godinu
9. Razmatranje i usvajanje Izvještaja o radu JU Centar za socijalni rad Doboj Istok za 2021. godinu
10. Razmatranje i usvajanje Izvještaja o radu Općinske izborne komisije Doboj Istok za 2021. godinu
11. Razmatranje i usvajanje prijedloga Odluke o nabavci stalnih sredstava za potrebe jedinstvenog organa državne uprave općine Doboj Istok.

Dnevni red stavljam na razmatranje.“

Emira Karić, predsjednica kluba vijećnika SDP: „Selamim i pozdravljam sve prisutne. Također bih unaprijed čestitala svim vjernicima islamske vjeroispovijesti nadolazeće Bajramske blagdane da ih u miru i sreći provedu. Ja bih samo, zamjeniče predsjedavajućeg, pitala ukoliko nema direktora vrtića i Doma zdravlja hoćemo li tu tačku stavljati ili ćemo ostaviti za sljedeću sjednicu? Na Kolegiju je dogovoreno da mora biti neko ispred ustanove, pa se zato javljam povodom realizacije.“

Izet Hodžić, zamjenik predsjedavajućeg Općinskog vijeća: „Ja se nadam da će direktori ili ovlašteni predstavnici u toku trajanja sjednice biti prisutni.“

Kemal Skopljak, vijećnik BPS: „Selamim i pozdravljam sve prisutne. Ja sam izašao da kažem vezano za ovo. Znači mene lično je direktor zamolio, pošto ima puno obaveza, da ga pred samu tačku obavijestim da dođe. Samo da znate da će sigurno doći.“

Izet Hodžić, zamjenik predsjedavajućeg Općinskog vijeća: „Hvala na pojašnjenju. Ja se nadam da će i direktorica obdaništa biti prisutna. Ako nema više vezano za dnevni red, dnevni red ovakav kako je pročitani i predložen stavljam na usvajanje. Ko je za predloženi dnevni red?“

Glasanje: ZA – 12, PROTIV – 0, UZDRŽANIH – 3.

Konstatujem da je dnevni red usvojen sa 12 glasova za, protiv ništa i 3 uzdržana.“

## **REALIZACIJA DNEVNOG REDA**

### **1. Razmatranje i usvajanje prijedloga Odluke o učešću u akciji nabavke Endoskopskog stuba**

Izet Hodžić, zamjenik predsjedavajućeg Općinskog vijeća: „Prijedlog Odluke ste dobili u materijalima. Ako neko smatra da trebaju dodatna objašnjenja, jer u Odluci je obrazloženo, kao i razlozima za donošenje Odluke i mislim da je dovoljno. Tačku stavljam na razmatranje. Nema prijavljenih. Tačku stavljam na glasanje. Ko je za prijedlog ove Odluke?“

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasnom odlukom prisutnih vijećnika usvojen ovaj prijedlog Odluke.“

### **2. Razmatranje i usvajanje prijedloga Odluke o poništenju Odluka o imenovanju i razrješenju člana Općinske izborne komisije Doboj Istok,**

Izet Hodžić, zamjenik predsjedavajućeg Općinskog vijeća: „I ovaj prijedlog Odluke ste dobili u materijalima. Pretpostavljam da svi znate o čemu se radi, ako ima potrebe za diskusijama i pitanjima dajem

mogućnost. Nema prijavljenih i zaključujem diskusiju. Stavljam na izjašnjavanje ovu tačku dnevnog reda. Ko je za ovaj prijedlog Odluke?

Glasanje: ZA – 15, PROTIV – 0, UZDRŽANIH – 0.

Konstatujem da je prijedlog Odluke usvojen jednoglasnom odlukom prisutnih vijećnika.“

### **3. Razmatranje i usvajanje prijedloga Odluke o razrješenju člana Općinske izborne komisije Doboj Istok**

Izet Hodžić, zamjenik predsjedavajućeg Općinskog vijeća: „ Prijedlog ove Odluke ste dobili u materijalima i istu stavljam na raspravu. Niko se ne javlja za diskusiju i prijedlog ove Odluke stavljam na izjašnjavanje. Ko je za?“

Glasanje: ZA – 15, PROTIV – 0, UZDRŽANIH – 0.

Konstatujem da je i ovaj prijedlog Odluke usvojen jednoglasnom odlukom prisutnih vijećnika.“

Vijećnik Hasan Hasančević je napustio sjednicu Općinskog vijeća iz opravdanih razloga.

### **4. Razmatranje i usvajanje prijedloga Odluke o imenovanju člana Općinske izborne komisije Doboj Istok,**

Izet Hodžić, zamjenik predsjedavajućeg Općinskog vijeća: „ Prijedlog Odluke ste takođe dobili u materijalima. Ovu tačku stavljam na raspravu i ako ima neko da se javi po ovoj tački. Nema. Ko je za prijedlog ove Odluke?“

Glasanje: ZA – 14, PROTIV – 0, UZDRŽANIH – 0 (Hasan Hasančević je trenutno odsutan).

Konstatujem da je i ovaj prijedlog Odluke usvojen jednoglasno sa 14 glasova trenutno prisutnih vijećnika.“

### **5. Razmatranje i usvajanje Izvještaja o izvršenju budžeta u općini Doboj Istok za 2021. godinu**

Izet Hodžić, zamjenik predsjedavajućeg Općinskog vijeća: „ Tačku stavljam na razmatranje ako ima eventualnih diskusija. Ako nema ja vas molim da se izjasnimo po ovoj tački dnevnog reda. Ko je za?“

Glasanje: ZA – 11, PROTIV – 0, UZDRŽANIH – 4.

Konstatujem da je Izvještaj usvojen sa 11 glasova za i 4 uzdržana.“

### **6. Razmatranje i usvajanje Izvještaja o utrošku sredstava budžetske rezerve za 2021. godinu**

Izet Hodžić, zamjenik predsjedavajućeg Općinskog vijeća: „ Tačku stavljam na razmatranje uz napomenu da ste izvještaj dobili u svojim materijalima. Sve je jasno. Nema prijavljenih za diskusiju. Izvještaj stavljam na izjašnjenje. Ko je za Izvještaj?“

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasnom odlukom prihvaćen Izvještaj o utrošku budžetskih sredstava za period 01.01. - 31.12.2021. godine.“

### **7. Razmatranje i usvajanje Izvještaja o raduJU za predškolski odgoj i obrazovanje „Dječja radost“ Doboj Istok za 2021. godinu**

Izet Hodžić, zamjenik predsjedavajućeg Općinskog vijeća: „ Izvještaj ste dobili u svojim materijalima. Koristim priliku da pozdravim direktoricu koja je stigla u međuvremenu. Otvaram raspravu ako ima neko potrebe da diskutuje.“

Emira Karić, predsjednica kluba vijećnika SDP: „Poštovana direktorice, ja bih da vas poselamim i ovaj put ću izaći zato što je potrebno. Opet jedan kvalitetan i sadržajan izvještaj, razumljiv izvještaj i izvještaj koji ima puno puno tih nekih tačaka koje ću ja sada deklarativno da iznesem i koje su za svaku pohvalu. Prije svega čestitam vam na borbi, a evo već smo na kraju kada je u pitanju pandemija, jer bili ste uspješni kao i škole na području općine Doboj Istok, a zadržat ću se na našoj općini. Znači sve se držalo pod određenom kontrolom, a znamo kakve smo sve mjere koristili i evo možemo reći da su te mjere bile uspješne. Da li se moglo više, uvijek se može više, ali ono što smo bili dužni to smo i uradili. Također bih čestitala na otplati kredita, jer je to zaista vrlo značajna stvar i na kraju krajeva možete opet dignuti neki kada već tako

uspješno otplaćujete. Još jedna pohvala na svim ovim projektima, zato što znamo kakva je to bila godina, a bili ste vrlo uspješni kad su projekti u pitanju. Drago mi je zbog toga i drago mi je zbog tih vaših vlastitih sredstava gdje vi možete i aplicirati na neke projekte i ako vam ta suma nije dovoljna imate ta vlastita sredstva. Vrlo je teško kada neko nema vlastitih sredstava, a mi smo pričali o tim stvarima i vidim da djeca imaju sve bolje i bolje uslove što mi je zaista drago. Imate te grupe i svaka čast i nastavite i dalje. Ovdje ne vidim da li su se roditelji izjašnjavali vezano za učenje stranog jezika. Vjerovatno se niste u to upuštali zbog pandemije i vjerovatno ćete se u narednom periodu vratiti na izjašnjavanje kada je u pitanju strani jezik. Sve čestitke i hvala vam na ovakvom izvještaju.“

Emira Skula, direktorica JU „Dječija radost“ Doboj Istok: „ Zamjeniče, gospodine načelnice, pomoćnici i cijenjeni članovi Općinskog vijeća. Pošto je ovo moj zadnji izvještaj htjela bih da vam se zahvalim. Prvo načelniku koji je imao razumijevanja i senzibiliteta za predškolski odgoj i vama svima i ovom sazivu i prošlom, jer ne bi obdanište uspjelo da nije bilo vaše podrške. Zamolila bih vas da i dalje stojite uz obdanište bez obzira ko bio direktor, jer to je sve zbog naše djece.“

Izet Hodžić, zamjenik predsjedavajućeg Općinskog vijeća: „ Hvala direktorice. Pošto nema više diskutanata zaključujem raspravu i tačku stavljam na izjašnjavanje. Ko je za predloženi izvještaj?

Glasanje: ZA – 15, PROTIV – 0, UZDRŽANIH – 0.

Konstatujem da je Izvještaj usvojen jednoglasnom odlukom prisutnih vijećnika.“

## **8. Razmatranje i usvajanje Izvještaja o radu JZU Dom zdravlja Doboj Istok za 2021. godinu**

Izet Hodžić, zamjenik predsjedavajućeg Općinskog vijeća: „ Direktor Doma zdravlja je stigao tako da imamo uslove za nesmetan rad što se tiče ove tačke dnevnog reda. Tačku stavljam na razmatranje ako ima eventualnih diskusija.“

Emira Karić, predsjednica kluba vijećnika SDP: „ Izašla sam zato što smatram da nikada pohvala i zahvalnica nije dosta. Mislim da ste pohvaljeni od strane Općinskog vijeća na neke druge načine, ali evo ponovo imamo taj izvještaj. Ja bih zaista čestitala svim uposlenicima, jer znamo kakva je bila godina i mislim da zaslužujete visoku ocjenu, hajmo reći tu neku akademsku ocjenu 10, da ne bih prešla na ovu školsku. Nije bilo nekih značajnijih problema u vašem radu kada su u pitanju ove pandemije i ostale službe i ono što u ovom izvještaju vidim nedostajalo je malo projekata. Neki su opet uspjeli bez obzira na pandemiju iskoristiti mogućnosti da dođu projekti i nadam se da ćete iduće godine povući malo više sredstava, mislim i red je što bi se reklo, a vi ste evo u samoj toj viziji i misiji naveli u planu za narednu godinu, pa vam ja još jednom čestitam i nadam se da ćete to što ste napisali i ispuniti.“

Kemal Skopljak, vijećnik BPS: „ Ja osjećam potrebu da se obratim upravo zato što radim u toj ustanovi i znam otprilike kakvo je stanje gore, znam šta se radi i kako se radi. Kao što kaže uvažena kolegica hvale nikada dosta, a ovaj protekli period je pokazao i dokazao koliko je bitan Dom zdravlja u našoj općini i koliko je bitno da taj Dom zdravlja radi kako treba i da ispunjava sve potrebe i zahtjeve naših pacijenata. Znači kovid je to najbolje pokazao. Ovdje moram da pohvalim način na koji je sastavljen izvještaj. Znači jako je transparentno prikazano ko je šta i koliko uradio. Prošli puta sam ja imao prijedlog, a direktor se sjeća, da uporedimo statističke podatke sa prethodnom godinom, znači broj pregleda, broj usluga i vidi se ovdje koliko su neke službe potegnule u prošloj godini. Bilo bi nefer da ne kažem da je to laboratorija i Hitna služba koje su daleko daleko prebacile broj usluga u odnosu na neki prosječan period u prethodnom periodu. Znači u Domu zdravlja se radi i hvala Bogu dobili smo i našeg internistu koji radi i koji je uposlenik Doma zdravlja, dobili smo pedijatra koji treba da počne da radi i treba da mu se stvore uslovi. Direktor je ovdje naveo da treba nešto preurediti i to podržavamo. U ovom izvještaju dosta je ambiciozan ovaj plan, znači aktivnosti u 2022. godini. Obzirom da direktor ovdje navodi teško finansijsko stanje i obratio se na neki način indirektno, što se može vidjeti u tekstu ovdje, malo i Općini i Načelniku i Vijeću u dijelu da on ostvari ovaj plan, a ovaj plan je jako bitan. Svi mi znamo, evo na kojem još Domu zdravlja imaju azbestne ploče u Federaciji? Nema ni na jednom. Na našem imaju. Pet godina pričamo o ovom krovu i krajnje je vrijeme da se realizuje na neki način, jer znamo da nije zdrav i da treba da se skida i da se mijenja taj krov. Obzirom da je direktor ovdje u finansijskom izvještaju iskazao gubitak koji nije beznačajan, jer 130.000 KM nije beznačajno. Ja razumijem razloge koje je direktor naveo, ali ako misli direktor da ostvari ovaj plan što se tiče rekonstrukcije krova, stolarije, opreme i pripremu uslova za ove naše specijalističke službe onda mu se mora na neki način pomoći. Da ne bude samo šuplja priča ovdje, moramo konkretno da pomognemo.

*Postavio bih pitanje direktoru da objasni kako je došlo do ovoga gubitka. Svi znamo da smo u prethodnom periodu imali neki suficit i da smo od svojih sredstava kupili i sanitetsko vozilo, a najedanput poslije ovog kolektivnog ugovora, da li nas je ošteti, da li nije, to će direktor najbolje objasniti.“*

*Kenan Mujkić, direktor JZU Dom zdravlja Doboj Istok: „Prije svega želim sve da vas poselamim. Ja se izvinjavam malo sam prehladen, pa mi je malo glas promijenjen. Hvala vam svima na ovim lijepim riječima. Što se tiče gubitaka imali smo nažalost drugostepenu presudu za doktora Šabića, pa smo morali tu svotu zajedno sa kamatama da isplatimo. Isto tako za kovid laboratorija je za 50.000 više potrošila u odnosu na prethodnu godinu, jer vadili su se nalazi. Isto tako imali smo gubitak pošto je jednostavno sve poskupilo. Poskupilo je gorivo i apsolutno sve je poskupilo. Što se tiče planova, mi smo nešto već i realizovali. Uredili smo za pedijatriju, jer nam je neophodno da prije svega otvorimo pedijatriju i ako Bog da početkom mjeseca maja otvaramo tu pedijatriju. Moram se ovdje zahvaliti načelniku koji je podržao taj plan, kao što je rekao Kemo, da se zamijene te azbestne ploče i da se izvrši utopljanje objekta. Koliko je meni poznato već je potpisan ugovor tako da bi ove godine to trebalo da se radi. Također ova akreditacija i što se tiče ove akreditacije mi smo skoro 80% završili i to nam je neophodno da završimo i sigurno je da ćemo završiti u roku. Ako ne bude 6 ili 7 val korone virusa, sigurno ćemo završiti u toku ove godine. Gubitak je veliki i ja sam toga svjestan, znači 130.000 nije malo. Ja nisam želio da stavim pozitivan finansijski izvještaj na uštrb naših sugrađana, jednostavno našim sugrađanima se pružila maksimalna pomoć što se tiče korona virusa. Ja nisam htio da ograničavam ljekare u laboratorijama, svi su se lijekovi davali, znaju Kemo i Nusret, nismo čak morali ni nabavljati kleksane, a mi smo nabavili jer je jedno vrijeme bilo tih gubitaka, zatim kisik kome god je trebao. Ovom prilikom želim prije svega da se zahvalim službi Hitne medicinske pomoći i ja sam se u tom izvještaju i zahvalio na neki način, jer oni su najviše potegli. Što se tiče korone oni su najviše potegli, poslije toga laboratorija, Sejfo kao radiološka služba i Zijo Alibašić koji je zaista bio na terenu 24 sata, 7 dana u sedmici. Čovjek nije uzimao ni godišnji, testirao je i davao vakcine itd. Mi ćemo u ovoj godini nastojati da taj zaista, opet kažem, malo veći finansijski gubitak na neki način iznevelišemo i nadamo se da će u ovoj godini biti bolje što se tiče finansija. Nije bilo nekih većih primjedbi od strane nadležnih organa i od strane pacijenata, a pogotovo me raduje što nije bilo nekih većih primjedbi od strane pacijenata. Hvala vam još jednom na razumijevanju i lijepim riječima.“*

*Kemal Bratić, općinski načelnik: „Ramazan je i trebamo hvaliti jedni druge i govoriti lijepe riječi našim ustanovama. Ja sam mišljenja da se uvijek može više i može bolje i kada se radi o obdaništu i o našem Domu zdravlja. Ono što je bitno jeste da imamo formirane te institucije, jer neke općine našeg ranga tek sada formiraju obdaništa. Kada se radi o Domu zdravlja oni su posebni i specifični jer imaju svoj fond i ono što je nepravda u nekom prethodnom periodu napravljena jeste da se za naš Dom zdravlja izdvaja manji dio sredstava u odnosu na broj osiguranika. Po podacima koje ja imam to je 10.600, čini mi se, da je trenutno broj osiguranika, dok neke općine imaju oko 7.000 osiguranika, a dobivaju samo 200.000 manje od općine Doboj Istok. Ja sam dogovorio sa direktorom Zavoda zdravstvenog osiguranja da napravimo jedan sastanak da pokušamo tu nepravdu ispraviti. Ne da mi od nekoga uzmemo nego da daju ono što pripada nama i to je ono na čemu trebamo raditi u narednom periodu kada se radi o finansiranju Doma zdravlja. Kada se radi o uposlenicima ne trebamo hvaliti jedni druge, jer mislim da je sve tamo riješeno sistemski i da imaju dobre i solidne plate u odnosu na okruženje u kojem živimo. Naravno ne osporavam borbu da one budu i bolje i veće. Kada se radi o rekonstrukciji mislim da je Dom zdravlja trebao u nekom svom prethodnom periodu da planira više, jer najlakše se osloniti na Općinu i na Načelnika i na Općinsko vijeće de vi to riješite. Ja svakodnevno dobivam po 10 zahtjeva što iz mjesnih zajednica, što iz boračkih, pa evo tako i iz Doma zdravlja. Znači moramo praviti nekakav plan i sistemski rješavati po prioritetima. Evo Zerina me gleda, jer znamo da je prioritet da riješimo tamo ukoritavanje i mi ćemo ga riješiti, jer smo tako dogovorili i obećali. Ovih dana ću potpisati ugovor, vrijednost radova je oko 270.000 KM. Naravno imali smo u prethodnim godinama rješavanje školskih objekata i riješili smo hvala Bogu uz malu pomoć nekih drugih. Napravili smo uslove za naše učenike, za naše obdanište i evo sada su nam došle zdravstvene ustanove i ove godine ćemo, ako Bog da, bez obzira da li učestvovao Fond za zaštitu okoliša sa kojim smo potpisali sporazum da finansiramo projekat na Domu zdravlja u vrijednosti 180.000 KM, 90.000 oni, a 90.000 iz budžeta općine, pa ćemo uraditi utopljanje ambulante u Velikoj Brijesnici, izmjenu stolarije i krova. Znači sve su to nekakvi planovi koje će općina na neki način realizovati. U narednom periodu svaka ustanova za sebe, kao i svaka kuća i svako domaćinstvo mora imati prioritete. Znači poredati prioritete i navesti šta je prioritet za jednu godinu, a šta za drugu godinu. U svim ovim izvještajima, a i u narednim koji će doći od naših ustanova otprilike oslanjamo se na budžet općine. Hvala Bogu dragom, pa je ova godina dobro prošla i mi možemo pomoći, ali šta bi bilo da mi ne možemo pomoći i onda bi došli u jedan ćorsokak i ne bi imali izlaz. Tako da*

nema šuplje priče, za ovom govornicom nema šuplje priče, jer ono što se obeća to se i uradi. Znači uradit ćemo rekonstrukciju Doma zdravlja i uradit ćemo rekonstrukciju ambulanti u Velikoj Brijesnici. Ostaju nam i druge ambulante da vidimo šta je to problem i šta treba uraditi. Ono što je najbitnije za mene kao pacijenta, kao građanina, jeste dajte da radimo na svijesti naših uposlenika da li bili u općini uposlenici, da li bili u Domu zdravlja, da li bili u obdaništu ili školama, jer to nam je najveći problem. Mi imamo ovdje jedan dobar pravac u Domu zdravlja u posljednje vrijeme i dajte da samo radimo ono za šta smo plaćeni. Nemojte da vodimo politiku u Domu zdravlja, nemojte da mi nešto tamo biramo i određujemo, dajte da radimo ono za šta smo plaćeni. Ako dajemo injekcije, dajte da dajemo injekcije, ako vozimo, dajte da vozimo, a ne da nam je da se svi nešto pitamo, a malo doprinosimo i na taj način pravimo samo neke smutnje ili nekakve probleme koje neko mora peglati. Tako da znate direktore, izgledno je bez obzira ako Fond za zaštitu okoliša ne bude realizovao svoj dio projekta, Općina Doboj Istok će učestvovati makar sa 100.000 KM na rekonstrukciji zgrade Doma zdravlja u Klokočnici i čini mi se oko 60.000 je za ambulatnu u Velikoj Brijesnici. Ostalo ćemo dogovarati do kraja godine ili u nekom narednom periodu.“

Hasan Hasančević, predsjednik kluba vijećnika SDA: „ Želim da sve poselamim i pozdravim. Direktorova priča i Kemalova o manjku i višku sredstava, ja smatram da nije gubitak sredstava ulaganje u zdravlje pacijenata ako je to nastalo u laboratoriji ili na izdavanju recepata. Znači to je ulaganje u zdravlje korisnika i na tome želim da čestitam. Pažljivo sam slušao i nije gubitak i ako treba naći će se ta sredstva, ali u datom momentu kada je neko bolestan, pogotovo kada je bio kovid da mu se izbjegne davanje nekih sredstava, davanje analize krvi i ostalog, jer ko nije prebolovao ne zna šta to znači, a ko je prebolovao zna, pogotovo ko je bio malo teže. Znači aferim, svaka čast. Pogotovo mi je drago što je to izneseno javno za govornicom da nema nekih radnji koje tamo neko naredi, nemojte vršiti ove preglede, de nemojte ove ili nemojte one. Ovo je za dobrobit građana Doboj Istoka, odnosno korisnika usluga Doma zdravlja. Drago mi je što je načelnik kazao da projekti idu i da nema šuplje priče.“

Kemal Skopljak, vijećnik BPS: „ Prije svega drago mi je da čujem ovako neke stvari iz prve ruke što bi se reklo, a daleko od toga da mi ne znamo šta znači Općina za naš Dom zdravlja i da Općina naravno iz svog budžeta ulaže. Daleko od toga da mi to ne znamo i ne cijenimo i samo ću navesti primjer parkinga koji je zbilja riješio za par godina ogroman problem oko parkinga gore oko Doma zdravlja. Znači mi to cijenimo i poštujemo. Druga stvar, drago mi je da je načelnik prepoznao problem finansiranja Doma zdravlja i da zna gdje leži rješenje. Znači onog trenutka kada se nama prizna u Fondu zdravstvenog osiguranja broj stvarnih naših koji jeste mi nećemo imati problema sa finansiranjem Doma zdravlja. To se već vuče godinama i nikada se nije ispeglalo i uvijek smo mi tu bili donji. Ako se po tom pitanju nešto uradi mi smo riješili naš problem i ne treba nam pomoć. Drago mi je da je načelnik to shvatio i da zna gdje treba probati rješavati.“

Mehmed Mehinović, vijećnik SBiH: „ Naravno da ću glasati za ovakav izvještaj i tu nema dileme nikakve. Međutim ponukan nekim diskusijama jednostavno morao sam se oglasiti. Naime, počeli smo se malo udaljavati od dnevnog reda i ne raspravljamo o izvještaju za prošlu godinu Doma zdravlja koji je stvarno po meni fantastičan. Nisam mislio ni riječi reći iz razloga što je misija ispunjena, čini mi se, sa 100% i to je jasno rečeno. Vizija koja je postavljena ispunjava se i u narednom periodu bit će, ako Bog da, realizovana. Građani su većinom zadovoljni i ovdje su samo riječi hvale. Međutim, ovdje je zaista jedan problem i drago mi je da čujem oko Doma zdravlja, a vodi se od '96. godine bitka za opstanak ovog Doma zdravlja i to da znate. Vodili su je neki ljudi prije mene, a vodila se i u moje vrijeme, a vodi se evo i sada, jer je ovdje slučaj da imamo više osiguranih lica nego stanovnika. Oni to nikada nisu htjeli shvatiti i prihvatiti. Radilo se kada je bilo 80 uposlenih, a na 10.000 stanovnika ne pripada toliko i vođeni su dugotrajni razgovori. Jedna grupa ljudi, a naravno ubrajam tu i svoju malenkost, pokušala je da spasi i hvala Bogu da je spasila i da imamo Dom zdravlja ovakav kakav imamo. Što se tiče izvještaja za 2021. godinu, stvarno je fantastičan, dobar, dali su svoj doprinos, a relevantan sam to da kažem iz razloga što sam hronični bolesnik i što konzumiram usluge Doma zdravlja i ambulante kojoj pripadam. Da iskoristim priliku da uručim riječi hvale svojoj porodičnoj medicini odakle dolazim, a naravno i Domu zdravlja, jer dolazio sam i u Dom zdravlja. Ako direktor sa menadžmentom uspije održati kakav je sada nivo i elan to će biti fantastično. Dobar prihod, a vidio sam popravljen je i standard radnika, potpisan je kolektivni ugovor, pa plaće i nisu tako loše, pa prema tome pokušajte ovaj nivo usluga održati i dobit ćete još veći aplauz nego što dobivate danas.“

Emira Karić, predsjednica kluba vijećnika SDP: „ Ja sam se javila zaista da određene riječi gospodina načelnika potpišem što bi se reklo, pogotovo kada je u pitanju diskusija vezana za te ljudske resurse u

određenim institucijama, firmama itd. Kvalitet se ne postiže fasadama i digitalizacijom određene firme jako je bitan taj ljudski resurs u određenoj firmi i stvarno moramo raditi na tome. Ja smatram da niko od nas nije zadovoljan i neće biti zadovoljan naredno možda desetljeće. Nešto se desilo, a šta se desilo, mi to popraviti moramo. Moramo akcentirati na dijelu odgovornosti šta je to za šta si ti zadužen i za šta si odgovoran. Mi jako puno popuštamo, ja ću to gledati kao menadžer, a načelnik kao načelnik, moraju se kockice posložiti da idemo u pravom smjeru, a mislim da možemo. Ja ću se također osvrnuti, a to kolega Hasko zna zamotati, ja znam da se ovdje govorilo o gubitku presude. Neću političariti, pošto određene stranke rade i neke presude nisu ni donešene, a ovdje se govori na TK o gubitcima itd. Ja neću, bilo je kako je bilo, ko je odgovoran, neka je odgovoran, a eto presuda je donesena i gubitak jeste. Samo želim da naglasim koliko sam ja razumjela gubitak je popriličan kada je u pitanju presuda.“

Izet Hodžić, zamjenik predsjedavajućeg Općinskog vijeća: „ Hvala kolegice Emira. Ima li prijavljenih? Zaključujem diskusiju po ovoj tački dnevnog reda i molim kolege da se izjasnimo. Ko je za prihvatanje ovog izvještaja?

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasnom odlukom prisutnih vijećnika na ovoj sjednici usvojen Izvještaj o radu JZU Dom zdravlja Doboj Istok za period 01.01.-31.12.2021. godine.“

### **9. Razmatranje i usvajanje Izvještaja o radu JU Centar za socijalni rad Doboj Istok za 2021. godinu**

Izet Hodžić, zamjenik predsjedavajućeg Općinskog vijeća: „ Izvještaj ste dobili u materijalima. Tačku stavljam na diskusiju ako ima prijavljenih. Nema. Prelazimo na izjašnjavanje po ovoj tački dnevnog reda. Ko je za prihvatanje Izvještaja o radu?“

Glasanje: ZA – 15, PROTIV – 0, UZDRŽANIH – 0.

Konstatujem da je Izvještaj o radu JU Centar za socijalni rad Doboj Istok za proteklu godinu usvojen jednoglasnom odlukom prisutnih vijećnika i vijećnica.“

### **10. Razmatranje i usvajanje Izvještaja o radu Općinske izborne komisije Doboj Istok za 2021. godinu**

Izet Hodžić, zamjenik predsjedavajućeg Općinskog vijeća: „ Izvještaj ste dobili u materijalima i dajem mogućnost za diskusiju.“

Emira Karić, predsjednica kluba vijećnika SDP: „ Ovo je izvještaj godine koja nije izborna, pa takav je kakav je. Ja sam samo izašla da na određeni način atakujem i zamolim za zaista malo boljom edukacijom pošto nam idu državni izbori. Ja ne mogu zaboraviti prethodnu godinu državnih izbora kada sam morala biti do 8 satu ujutro zbog nedovoljne edukacije članova komisija. Ako može nekako da ona i ranije krene i da zaista bude permanentna kako bi izbjegli upravo te stvari. Mislim da ćete imati dosta posla, ali eto o tom potom.“

Hasan Hasančević, predsjednik kluba vijećnika SDA: „ I ja sam izašao kao i kolegica Emira da kažem da mi predstavnici političkih stranaka šaljemo Izornoj komisiji kvalitetne ljude koji na terenu mogu da obave posao. Svi oni prođu obuku, svi polože testove i kada dođe vrijeme izbora, problem. I do mene je i do vas kolegice i do nekih predsjednika političkih stranaka, jer ne treba tamo slati kao Centru za socijalni rad za određenu naknadu za 50 ili 70 KM. Treba poslati kvalitetne kadrove, jer smatram da svi imamo kvalitetne kadrove koji će taj dan odraditi posao kako treba. Svi su oni učestvovali u izborima, ne jedanput, nego više puta, ali desi se što se desi, pa se ostane do ujutro i u brojanju i u prebrojavanju. Neko nažalost podlegne nekim vrstama pritiska, ali smatram da mi prvo trebamo kao političke stranke ili partije poslati kvalitetne kadrove njima, a njih molim kada budu testovi da vrate političkim strankama nekvalitetne kadrove i da dostave druge.“

Emira Karić, predsjednica kluba vijećnika SDP: „Itekako je pohvalna samokritika, ali zaista je to i ja sam shvatila kao samokritiku zato što je odnos snaga na terenu kada su bili predsjednici možda 80 – 20 i eto prihvatam onih 20 ispred političkog subjekta iz kojeg dolazim. Isto tako pohvaljujem samokritiku od onih 80 i da se o tim stvarima mora povesti računa. Nisu to samo članovi komisije, tu su i posmatrači. Mislim da su nam posmatrači na prošlim izborima bili kvalitetnije educirani od samih komisija.“

Nermin Mrkanović, predsjednik Općinske izborne komisije Doboj Istok: „Prije svega da vas sve selamim i pozdravim. Ja ću vrlo kratko. Pošto smo mi u novom sazivu kada je u pitanju Općinska izborna komisija, znači sva tri člana su nova, a dolaze vrlo bitni državni izbori, a i općinski izbori su takođe bitni, ja svakako očekujem pomoć od svih političkih stranaka kako u sazivu i formiranju biračkih odbora, formiranju delegata i formiranju posmatrača da to bude fer i korektno. Sa moje strane gledat ću da edukacija bude provedena maksimalno ozbiljno, da se provede uz ozbiljnost koja će nam donijeti lakši posao za vrijeme izbora da ne bude problema i da ne bude, prije svega, oštećenih za vrijeme izbora. Znači ono što bude do mene i do moje ekipe koja će biti zadužena za edukaciju maksimalno ćemo dati sve od sebe i ako treba i da produžimo tu obuku i ako treba da ranije počnemo. Naravno mi ćemo sve raditi po uputama i procedurama koje dobijemo od Centralne izborne komisije. Još jednom želim da se zahvalim u svoje ime u ime Općinske izborne komisije prvo na prilici koju ste nam dali da se pokažemo u nekom novom sastavu i mlađem sastavu. Ako ima još kakvih pitanja, jer svaka pomoć će nam dobro doći da ovo provedemo kako treba.“

Izet Hodžić, zamjenik predsjedavajućeg Općinskog vijeća: „Hvala predsjedniče. Diskutanata nema više i zaključujem diskusiju po ovoj tački dnevnog reda. Prelazimo na izjašnjavanje i ja vas molim da se dizanjem ruke izjasnimo. Ko je za prihvatanje ovog Izvještaja za proteklu godinu?“

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasnom odlukom prisutnih vijećnika usvojen Izvještaj o radu Općinske izborne komisije Doboj Istok za 2021. godinu.“

### **11. Razmatranje i usvajanje prijedloga Odluke o nabavci stalnih sredstava za potrebe jedinstvenog organa državne uprave općine Doboj Istok**

Izet Hodžić, zamjenik predsjedavajućeg Općinskog vijeća: „Prijedlog ove Odluke ste dobili kao što sam rekao u elektronskoj formi, ali i printanoj na stolovima. Znači imate prijedlog Odluke i razloge za donošenje. Otvaram diskusiju po ovoj tački dnevnog reda i ako ima neko potrebu da diskutuje, da nešto pita, bujrum.“

Emira Karić, predsjednica kluba vijećnika SDP: „Poštovani zamjeniče, opet imamo određeni problem vjerovatno sa Poslovníkom o radu. Ja zaista ne znam kada dođe proširenje dnevnog reda, a evo može sekretar pojasniti kako da uložimo amandman. Da li na samoj sjednici ili prije na 24 sata, jer mislim da smo imali neke priče o tome. Isto tako mogu ovdje da kažem i da izrazim svoje nezadovoljstvo, morate dozvoliti vijećničke inicijative, jer to je diskriminacija i morate tu diskriminaciju riješiti. Ja neću to da izlažem u medijima i dalje, ali stvarno taj dio Poslovníka se mora riješiti jer ispada da samo u općini Doboj Istok nemamo pravo na vijećničke inicijative. Što se tiče proširenja dnevnog reda ja ću biti iskrena, bit ću suzdržana. Neću biti ni za, a neću biti ni protiv, a objasnit ću zašto i red je objasniti. Mislim da nije vakat za ovoliku cijenu. Ako je u pitanju vozilo za službe mislim da to može biti malo manja cijena. Ko je korisnik tog vozila nije ni objašnjeno, a mislim da se za manju cijenu može kupiti neko solidno vozilo. Ja volim da ekonomišem, ne volim što se kaže u toj odluci, da nije vozilo više, hajmo reći, u upotrebi i dolazi do određenih troškova. Isto tako neću reći da je diskriminacija, ali nije mi jasno, evo menadžment škola, ja sam juče pet puta svoje auto upalila i ne tražim od ministarstva nekakva finansijska sredstva za neko vozilo itd. Mislim da nije vakat za tu cijenu i mislim da treba promijeniti, ali sa 35.000 ja se ne mogu složiti.“

Izet Hodžić, zamjenik predsjedavajućeg Općinskog vijeća: „Hvala Emira. Ima li još diskutanata? Ako nema zaključujem diskusiju po ovoj tački dnevnog reda i predlažem da se izjasnimo. Ko je za prihvatanje prijedloga Odluke?“

Glasanje: ZA – 11, PROTIV – 0, UZDRŽANIH – 4.

Konstatujem da je ovaj prijedlog Odluke prihvaćen sa 11 glasova za i 4 uzdržana. Zaključujem sjednicu Općinskog vijeća. Iskoristio bih priliku da svima vama poželim sretne i beričetne nastupajuće Bajramske blagdane. Hvala vam na saradnji.“

Sjednica je završena u 11,00 sati.

ZAPISNIČAR  
Behara Hadžić

SEKRETAR OPĆINE  
Omer Hadžić

ZAMJENIK PREDSJEDAVAJUĆEG  
OPĆINSKOG VIJEĆA  
Izet Hodžić



*Zapisnik je usvojen na 17. redovnoj sjednici Općinskog vijeća Dobož Istok održanoj dana 26.05.2022. godine.*

*U Klokočnici, dana 27.05.2022. godine*

*Zabilješku sačinio  
Omer Hadžić, sekretar Općine*